

资质通鉴

貴
質
通
鑒

資治通鑑卷第二百八十三

讀史通論詩讀史通論卷第二百八十三

光奉

勅編集

後晉紀四

起玄默攝提格盡闕逢
執徐正月凡二年有奇

高祖聖文章武明德孝皇帝下

天福七年春正月丁巳鎮州牙將自西郭水碾門導官軍入城
殺守陴民二萬人執安重榮斬之杜重威殺導者自以為功庚
申重榮首至鄴都帝命漆之函送契丹 癸亥改鎮州為恒州
成德軍為順國軍 丙寅以門下侍郎同平章事趙瑩為侍中
以杜重威為順國節度使兼侍中安重榮私財及恒州府庫重
威盡有之帝知而不問又表衛尉少卿范陽王瑜為副使瑜為
之重斂於民恒人不勝其苦 張式父鐸詣闕訟冤壬午以河

陽節度使王周為彰義節度使代張彥澤

閩主曦立皇后李

氏同平章事真之女也嗜酒剛復曦寵而憚之

彰武節度使

丁審琪養部曲千人縱之為暴於境內軍校賀行政與諸胡相

結為亂攻延州帝遣曹州防禦使何重建將兵救之同鄜援兵

繼至乃得免二月癸巳以重建為彰武留後召審琪歸朝重建

雲胡間胡人也唐左丞相宋齊丘固求豫政事唐主聽入中

書又求領尚書省乃罷侍中壽王景遂判尚書省吏領中書門

下省以齊丘知尚書省事其三省事並取齊王璟參決齊丘視

事數月親吏夏昌圖盜官錢三千緡齊丘判貸其死唐主大怒

斬昌圖齊丘稱疾請罷省事從之

涇州奏遣押牙陳延暉持

敕書詣涼州州中將吏請延暉為節度使

三月閩主曦立長

樂王亞澄為閩王

張彥澤在涇州擅發兵擊諸胡兵皆敗沒

調民馬千餘匹以補之還至陝獲亡將楊洪乘醉斷其手足而
斬之王周奏彥澤在鎮貪殘不法二十六條民散亡者五千餘
戶彥澤既至帝以其有軍功又與楊光遠連姻釋不問夏四月
己未右諫議大夫鄭受益上言楊洪所以被屠由陛下去歲送
張式與彥澤使之還致彥澤敢肆凶殘無所忌憚見聞之人無
不切齒而陛下曾不動心一無詰讓淑慝莫辨賞罰無章中外
皆言陛下受彥澤所獻馬百匹聽其如是臣竊為陛下惜此惡
名乞正彥澤罪法以洴洗聖德疏奏留中受益從謹之兄子也
庚申刑部郎中李濤等伏閣極論彥澤之罪語甚切至辛酉敕
張彥澤削一階降爵一級張式父及子弟皆拜官涇州民復業
者減其徭賦癸亥李濤復與兩省及御史臺官伏閣奏彥澤罰
太輕請論如法帝召濤面諭之濤端笏前迫殿陛論辨聲色俱

厲帝怒連叱之濤不退帝曰朕已許彥澤不死濤曰陛下許彥澤不死不可負不知范延光鐵券安在帝拂衣起入禁中丙寅以彥澤為左龍武大將軍漢高祖寢疾以其子秦王弘度晉王弘熙皆驕恣少子越王弘昌孝謹有智識與右僕射兼西御院使王翔謀出弘度鎮邕州弘熙鎮容州而立弘昌制命將行會崇文使蕭益入問疾以其事訪之益曰立嫡以長違之必亂乃止丁丑高祖殂高祖為人辨察多權數好自矜大常謂中國天子為洛州刺史嶺南珍異所聚每窮奢極麗宮殿悉以金玉珠翠為飾用刑慘酷有灌鼻割舌支解剝剔炮炙烹蒸之法或聚毒蛇水中以罪人投之謂之水獄同平章事楊洞潛諫不聽末年尤猜忌以士人多為子孫計故專任官者由是其國中官者大盛秦王弘度即皇帝位更名玠以弘熙輔政改元先天尊

毋趙昭儀曰皇太妃 契丹以晉招納吐谷渾遣使來讓帝憂
悒不知爲計五月己亥始有疾 乙巳尊太妃劉氏爲皇太后
太后帝之庶母也 唐丞相太保宋齊丘旣罷尚書省不復朝
謁唐主遣壽王景遂勞問許鎮洪州始入朝唐主與之宴酒酣
齊丘曰陛下中興臣之力也奈何忘之唐主怒曰公以遊客干
朕今爲三公亦足矣乃與人言朕鳥喙如句踐難與共安樂有
之乎齊丘曰臣實有此言臣爲遊客時陛下乃偏裨耳今日殺
臣可矣明日唐主手詔謝之曰朕之褊性子嵩平昔所知少相
親老相怨可乎丙午以齊丘爲鎮南節度使 帝寢疾一旦馮
道獨對帝命幼子重睿出拜之又令宦者抱重睿置道懷中其
意蓋欲道輔立之六月乙丑帝殂道與天平節度使侍衛馬步
都虞候景延廣議以國家多難宜立長君乃奉廣晉尹齊王重

貴爲嗣是日齊王卽皇帝位延廣以爲己功始用事禁都下人
母得偶語初高祖疾亟有旨召河東節度使劉知遠入輔政齊
王寢之知遠由是怨齊王 丁卯尊皇太后曰太皇太后皇后
曰皇太后 閩富沙王延政圍汀州閩主曦發漳泉兵五千救
之又遣其將林守亮入尤溪大明宮使黃敬忠屯尤口欲乘虛
襲建州國計使黃紹頰將步卒八千爲二軍聲援 秋七月壬
辰太皇太后劉氏殂 閩富沙王延政攻汀州四十二戰不克
而歸其將包洪實陳望將水軍以禦福州之師丁酉遇於尤口
黃敬忠將戰占者言時刻未利按兵不動洪實等引兵登岸水
陸夾攻之殺敬忠俘斬二千級林守亮黃紹頰皆遁歸 庚子
大赦 癸卯加景延廣同平章事兼侍衛馬步都指揮使 勲
舊皆欲復置樞密使馮道等三表請以樞密舊職讓之帝不許

有神降於博羅縣民家與人言而不見其形問閭人往占吉
凶多驗縣吏張遇賢事之甚謹時循州盜賊羣起莫相統一賊
帥共禱于神神大言曰張遇賢當爲汝主於是羣帥共奉遇賢
稱中天八國王改元永樂置百官攻掠海隅遇賢年少無它方
略諸將但告進退而已漢主以越王弘昌爲都統循王弘杲爲
副以討之戰于錢帛館漢兵不利二王皆爲賊所圍指揮使陳
道庠等力戰救之得免東方州縣多爲遇賢所陷道庠端州人
也 高行周圍襄州踰年不下城中食盡奉國軍都虞候曲周
王清言於行周曰賊城已危我師已老民力已困不早迫之尚
何俟乎與奉國都指揮使元城劉詞帥衆先登八月拔之安從
進舉族自焚 甲子以趙瑩爲中書令 閩主曦遣使以手詔
及金器九百錢萬緡將吏敕告六百四十通求和於富沙王延

政延政不受丙寅閩主曦宴羣臣於九龍殿從子繼柔不能飲強之繼柔私減其酒曦怒并客將斬之 閩人鑄永隆通寶大

鐵錢一當鈔錢百 漢葬天皇大帝于康陵廟號高祖 唐主

自為吳相興利除害變更舊法甚多及即位命法官及尚書刪

定為昇元條三十卷庚寅行之 閩主曦以同平章事候官余

廷英為泉州刺史廷英貪穢掠人女子詐稱受詔采擇以備後

宮事覺曦遣御史按之廷英懼詣福州自歸曦詰責將以屬吏

廷英退獻買宴錢萬緡曦悅明日召見謂曰宴已買矣皇后具

物安在廷英復獻錢於李后乃遣歸泉州自是諸州皆別貢皇

后物未幾復召廷英為相 冬十月丙子張遇賢陷循州殺漢

刺史劉傳 楚王希範作天策府極棟宇之盛戶牖欄檻皆飾

以金玉塗壁用丹砂數十萬斤地衣春夏用角簟秋冬用木綿

興子弟僚屬遊宴其間 十一月庚寅葬聖文章武明德孝皇
帝于顯陵廟號高祖 先是河南北諸州官自賣海鹽歲收緡
錢十七萬又散釐鹽斂民錢言事者稱民坐私販鹽抵罪者衆
不若聽民自販而歲以官所賣錢直斂於民謂之食鹽錢高祖
從之俄而鹽價頓賤每斤至十錢至是三司使董遇欲增求羨
利而難於驟變前法乃重征鹽商過者七錢留賣者十錢由是
鹽商殆絕而官復自賣其食鹽錢至今斂之如故 閩鹽鐵使
右僕射李仁遇敏之子閩主曦之甥也年少美姿容得幸於曦
十二月以仁遇為左僕射兼中書侍郎翰林學士吏部侍郎李
光準為中書侍郎兼戶部尚書並同平章事曦荒淫無度嘗夜
宴光準醉忤旨命執送都市斬之吏不敢殺繫獄中明日視朝
召復其位是夕又宴收翰林學士周維岳下獄吏拂榻待之曰

相公昨夜宿此尚書勿憂醒而釋之它日又宴侍臣皆以醉去
獨維岳在曦曰維岳身甚小何飲酒之多左右或曰酒有別腸
不必長大曦欣然命粹維岳下殿欲剖視其酒腸或曰殺維岳
無人復能侍陛下劇飲者乃捨之 帝之初即位也大臣議奉
表稱臣告哀於契丹景延廣請致書稱孫而不稱臣李崧曰屈
身以為社稷何恥之有陛下如此它日必躬擐甲胃與契丹戰
於時悔無益矣延廣固爭馮道依違其間帝卒從延廣議契丹
大怒遣使來責讓且言何得不先承稟遽即帝位延廣復以不
遜語荅之契丹盧龍節度使趙延壽欲代晉帝中國屢說契丹
擊晉契丹主頗然之

齊王上

天福八年春正月癸卯蜀主以宣徽使兼宮苑使田勣全領永

平節度使劄全宦者也引前蜀王承休爲比而命之國人非之
帝聞契丹將入寇二月己未發鄴都乙丑至東京然猶與契
丹問遺相往來無虛月唐宣城王景達剛毅開爽烈祖愛之
屢欲以爲嗣宋齊丘亟稱其才唐主以齊王璟年長而止璟以
是怨齊丘唐主幼子景暘母种氏有寵齊王璟母宋皇后稀得
進見唐主如璟宮遇璟親調樂器大怒謂讓者數日种氏乘間
言景暘雖幼而慧可以爲嗣唐主怒曰子有過父訓之常事也
國家大計女子何得預知即命嫁之唐主嘗夢吞靈丹旦而方
士史守冲獻丹方以爲神而餌之侵成躁急左右諫不聽嘗以
藥賜李建勳建勳曰臣餌之數日已覺躁熱况多餌乎唐主曰
朕服之久矣羣臣奏事往往暴怒然或有正色論辨中理者亦
斂容慰謝而從之唐主問道士王栖霞何道可致太平對曰王

者治心治身乃治家國今陛下尚未能去飢嗔飽喜何論太平
宋后自簾中稱歎以爲至言凡唐主所賜予栖霞皆不受栖霞
常爲人奏章唐主欲爲之築壇辭曰國用方乏何暇及此俟焚
章不化乃當奏請耳駕部郎中馮延巳爲齊王元帥府掌書記
性傾巧與宋齊丘及宣徽副使陳覺相結同府在已上者延巳
稍以計逐之延巳嘗戲謂中書侍郎孫晟曰公有何能爲中書
郎晟曰晟山東鄙儒文章不如公談諧不如公諂詐不如公然
主上使公與齊王遊處蓋欲以仁義輔導之也豈但爲聲色狗
馬之友邪晟誠無能如公之能適足爲國家之禍耳延巳歙州
人也又有魏岑者亦在齊王府給事中常夢錫屢言陳覺馮
延巳魏岑皆佞邪小人不宜侍東宮司門郎中判大理寺蕭儼
表稱陳覺姦回亂政唐主頗感寤未及去會疽發背祕不令人

知密令醫治之聽政如故庚午疾亟太醫吳廷裕遣親信召齊王璟入侍疾唐主謂璟曰吾餌金石始欲益壽乃更傷生汝宜戒之是夕殂秘不發喪下制以齊王監國大赦孫晟恐馮延巳等用事欲稱遺詔令太后臨朝稱制翰林學士李貽業曰先帝嘗云婦人預政亂之本也安肯自爲厲階此必近習姦人之詐也且嗣君春秋已長明德著聞公何得遽爲亡國之言若果宣行吾必對百官毀之晟懼而止貽業蔚之從曾孫也丙子始宣遺制烈祖末年卞急近臣多罹譴罰陳覺稱疾累月不入及宣遺詔乃出蕭儼劾奏覺端居私室以俟升遐請按其罪齊王不許自烈祖相吳禁歷良爲賤令買奴婢者通官作券馮延巳及弟禮部員外郎延魯俱在元帥府草遺詔聽民賣男女意欲自買姬妾蕭儼駁曰此必延巳等所爲非大行之命也昔延魯爲

東都判官已有此請先帝訪臣臣對曰陛下昔為吳相民有鬻男女者為出府金贖而歸之故遠近歸心今即位而反之使貧人之子為富人廝役可乎先帝以為然將治延魯罪臣以為延魯曾愚無足責先帝斜封延魯章抹三筆持入宮請求諸宮中必尚在齊王命取先帝時留中章奏得千餘道皆斜封一抹果得延魯疏然以遺詔已行竟不之改 閩富沙王延政稱帝於建州國號大殷大赦改元天德以將樂縣為鏞州延平鎮為鐔州立皇后張氏以節度判官潘承祐為吏部尚書節度巡官建陽楊思恭為兵部尚書未幾以承祐同平章事思恭遷僕射錄軍國事延政服赭袍視事然牙參及接鄰國使者猶如藩鎮禮殷國小民貧軍旅不息楊思恭以善舉斂得幸增田畝山澤之稅至於魚鹽蔬果無不倍征國人謂之楊剥皮 三月己卯朔以

中書令趙瑩為晉昌節度使兼中書令以晉昌節度使兼侍中桑維翰為侍中 唐元宗即位大赦改元保大祕書郎韓熙載請俟踰年改元不從尊皇后曰皇太后立妃鍾氏為皇后唐主未聽政馮延巳屢入白事一日至數四唐主曰書記有常職何為如其其煩也唐主為人謙謹初即位不名大臣數延公卿論政體李建勳謂人曰主上寬仁大度優於先帝但性習未定苟旁無正人但恐不能守先帝之業耳唐主以鎮南節度使宋齊丘為太保兼中書令奉化節度使周宗為侍中唐主以齊丘宗先朝勳舊故順人望召為相政事皆自決之徙壽王景遂為燕王宣城王景達為鄂王初唐主為齊王知政事每有過失常夢錫常直言規正始雖忿懟終以諒直多之及即位許以為翰林學士齊丘之黨疾之坐封駁制書貶池州判官池州多遷客節度